

Obuka za spasioce na kupalištima

Tuzlanski kanton je u posljednjih nekoliko godina uspješno razvio ljetni turizam zahvaljujući velikom broju vještačkih jezera i bazena (otvoreni i zatvoreni) na kojima se tokom ljetnih mjeseci okuplja veliki broj građana – kupača. Malo je poznato da je obaveza vlasnika kupališta, plaža i sličnih objekata koji pružaju usluge da su dužni, o svom trošku, obavezno organizirati odgovarajuću spasilačku službu a kako je to utvrđeno u odredbama člana 80. Zakona o zaštiti i spašavanju ljudi i materijalnih dobara od prirodnih i drugih nesreća („Službene novine Federacije BiH“, broj:39/03, 22/06 i 43/10). Tamo gdje je ta spasilačka služba organizirana i popunjena sa obučanim i licenciranim spasiocima, kao što je to slučaj sa vještačkim jezerima „Panonika“ Tuzla veća je i sigurnost kupača. Nažalost, na većini ostalih kupališta slika je potpuno drugačija. SPASILAC je poslednju deceniju postalo prilično popularno zanimanje među mladima. Posao je na plaži ili na bazenima, često sezonski, a i američke serije su doprinele njegovoj atraktivnosti.



Klub spasilaca „Gradina“ Srebrenik je, u cilju osposobljavanja spasilaca na kupalištima a time i pružanja prilike mladima za dodatnom zaradom tokom ljetnih mjeseci, organizirao 60-to satni napredni kurs koji je uspješno završilo šest kandidata. Osposobljavanje spasilaca obavljeno je prema programu i normama Svjetske organizacije spašavanja života na vodi (ILS-e), a obuhvata teorijsku i praktičnu obuku iz znanja i vještina pružanja prve pomoći, te isto tako teorijsku i praktičnu obuku iz tehnika spašavanja.

Na raspisani konkurs se prijavilo 17 kandidata koji su morali zadovoljiti norme, koje podrazumijevaju da je stariji od 16 godina, psihofizički zdrav te obavezno inicijalno testiranje, koje između ostalog zahtijevaju ronjenje 25 metara te isplivati 400 metara za manje od osam minuta. Upravo zbog ovih normi, kandidati za spasioce najčešće su iskusni plivači,



aktivni ili nekadašnji plivači i vaterpolisti. Treninzi su naporni, svaki dan se radi, poštuje se disciplina, jer ovaj posao ne dopušta greške, pošto je u pitanju ljudski život.

Obuka traje 60 časova i obuhvata tehnike spašavanja i potrebna znanja za izvlačenje osobe iz vode te pružanje prve pomoći. U saradnji sa Crvenim križom općine Srebrenik i prim.dr. Ešrefom Harčinovićem, specijalistom urgentne medicine, savladana su i usvojena znanja kako da pruže prvu pomoć utopljenicima, načine reanimacije, imobilizaciju kičme itd. Praktičnu



obuku izveo je mr.sci. Elvir Čudić, profesor tjelesnog odgoja. Nakon završene obuke organizirano je i polaganje testa pred komisijom u kojoj je bio i treći član mr.sci. Bajro Imširović, profesor odbrane i

sigurnosti. Kandidati su testirani u plivanju na 100 metara kraul tehnikom za manje od 90 sekundi. Takođe, moraju da pređu 50 metara specijalnim spasilačkim stilom plivanja nakon skoka, za manje od 45 sekundi., pokazuju i kondiciju, načinu prilazka utopljeniku, transport, pružanje prve pomoći. Dobijena licenca vrijedi dvije godine i priznaje se u Bosni i Hercegovini, a može se tražiti i međunarodna licenca za rad na plažama širom Europe. Stečena znanja mogu primijeniti u svakodnevnim situacijama i nekome pomoći.



Klub spasilaca „Gradina“ Srebrenik će organizirati i ubuduće obuku za spasioce na vodi za grupe od 5 – 20 polaznika.

Mr.sci. Bajro Imširović